



## Tumemwona Masihi

**T**umemwona yeye aliyeandikiwa na Musa katika torati, na manabii. — Yohana 1:45.

Filipo alimwita Nathanaeli. Huyu aliyeitwa alikuwa katika ule umati wakati Yohana Mbatizaji alipomwonesha Yesu kama Mwana-Kondoo wa Mungu. Nathanaeli alipomtazama Yesu, alikata tamaa. Je, huyu mtu, aliyeonekana kuchoshwa na kazi za shokoa na umaskini, angeweza kuwa ndiye Masihi? Hata hivyo, Nathanaeli hakuweza kuamua kumkataa Yesu, kwani ujumbe wa Yohana ulikuwa umemsadikisha moyoni mwake.

Wakati Filipo alipomwita, Nathanaeli alikuwa amejitenga kwenye bustani tulivu ili kutafakari juu ya tangazo la Yohana na unabii kuhusu Masihi. Alisali kwamba ikiwa yule aliyetamkwa na Yohana ndiye mkombozi, jambo hilo lingeweza kufahamika kwake, na Roho Mtakatifu alimtuliza kwa uhakika kwamba Mungu alikuwa ametembelea watu Wake na kuinua pembe ya wokovu kwa ajili yao...

Ujumbe huu, "Tumemwona yeye aliyeandikiwa na Musa katika torati, na manabii," ulionekana kwa Nathanaeli kuwa jibu la moja kwa moja la ombi lake. Lakini Filipo bado pia imani yake haikuwa imara. Aliongezea kwa mashaka, "Yesu, mwana wa Yusufu, mtu wa Nazareti." Kwa mara nyingine, hisia ya kibaguzi ikainuka moyoni mwa Nathanaeli. Akasema, "Laweza neno jema kutoka Nazareti?"

Filipo hakujiingiza kwenye pambano lolote. Yeye akamwambia, "Njoo uone." "Yesu akamwona Nathanaeli anakuja kwake, akanena habari zake, Tazama, Mwisraeli kweli kweli, hamna hila ndani yake." Akishangaa, Nathanaeli akamwambia, "Umepataje kunitambua? Yesu akajibu, akamwambia, Kabla Filipo hajakuita, ulipokuwapo chini ya mtini nilikuona."

Ilitosha. Roho Mtakatifu aliyekuwa amemshuhudia Nathanaeli katika sala yake ya faragha chini ya mtini sasa alizungumza naye kupitia maneno ya Yesu. Ingawa alikuwa na shaka na akawa na ubaguzi kidogo, Nathanaeli alimjia Kristo akiwa na shauku ya kweli ya kutafuta ukweli, na sasa shauku yake ilikutana na ukweli. Imani yake ilizidi hata ya yule aliyemleta kwa Yesu. Akajibu na kusema, "Rabi, wewe u Mwana wa Mungu, ndiwe Mfalme wa Israeli."

Kama Nathanaeli angekuwa ametegemea marabi kwa mwongozo, asingempata Yesu kamwe. Ilikuwa ni kwa kuona na kuamua yeye mwenyewe ndipo alipoweza kuwa mwanafunzi. Hali hii ipo pia kwa wengi leo ambao ubaguzi unawazuia kuona mema. Matokeo yangukuwa tofauti kiasi gani kama wangekubali mwaliko, "njoo uone!"

Wakati wanapotumainia mwongozo wa mamlaka ya kibinadamu, hakuna kati ya hao atakayefikia maarifa yanayookoa ya ile kweli. Kama Nathanaeli, tunahitaji kujifunza Neno la Mungu sisi wenyewe, na kuomba nuru ya Roho Mtakatifu. Yeye aliyemwona Nathanaeli chini ya mtini atatuona pia katika mahali pa siri pa sala. Malaika kutoka ulimwengu wa nuru wako karibu na wale ambao kwa unyenyekevu wanatafuta mwongozo wa Mungu (The Desire of Ages, 139-141).